



**PENERANGAN ...** Presiden NUS, Prof. Tan Eng Chye (empat dari kanan) sedang memberi penerangan berkaitan kampus kepada Datuk Dr. Yusof Yacob (tiga kiri). Turut kelihatan Dr Jenifer (tiga kanan), Prof. Dr. Fong Soon (dua kiri) dan Dr. Mohd. Zaki (tepi kanan).

## Pensyarah UMS antara delegasi Kementerian Pelajaran dan Inovasi Sabah ke Singapura

NST 22.1.2019 2

**KOTA KINABALU:** Dua pensyarah kanan Universiti Malaysia Sabah (UMS) menjadi antara delegasi yang bersama-sama Menteri Pelajaran dan Inovasi Sabah, Datuk Dr. Yusof Yacob dalam lawatan rasmi ke Singapura baru-baru ini.

Dua pensyarah kanan itu adalah Pengarah Pusat e-Pembelajaran UMS, Prof. Dr. Fong Soon Fook dan pensyarah kanan Fakulti Psikologi dan Pendidikan, Profesor Madya Dr. Mohd. Zaki Ishak yang mewakili Naib Canselor UMS, Prof. Datuk Dr. D Kamarudin D Mudin menyertai delegasi itu.

Dr. Mohd. Zaki Ishak berkata, rombongan delegasi telah mengadakan kunjungan ke beberapa buah sekolah rendah dan menengah, institusi pendidikan tinggi dan agensi di Singapura, antaranya Institute of Technical Education (ITE), National University of Singapore (NUS), dan Kementerian Pendidikan Singapura.

"Lawatan anjuran Kementerian Pelajaran dan Inovasi Sabah ini adalah lawatan balas terhadap kunjungan rasmi Timbalan Perdana Menteri Singapura, Teo Chee Hean ke Sabah pada tahun lalu, dengan

tujuan untuk meneroka model pendidikan di Singapura pada peringkat pra sekolah, sekolah rendah, sekolah menengah, dan institusi pendidikan tinggi," katanya dalam kenyataan kelmarin.

Sementara itu, Prof. Dr. Fong Soon Fook memaklumkan bahawa hasil kunjungan rasmi itu juga telah membuka ruang kepada pemeteraian satu memorandum persefahaman (MoU) antara kerajaan Negeri Sabah dan Kementerian Pendidikan Singapura yang dijangka akan dilaksanakan dalam masa terdekat.

"MoU tersebut antara lain adalah usaha ke arah kerjasama dalam beberapa bidang yang dikenal pasti, antaranya pertukaran staf dan pelajar, pengajaran kursus-kursus bercirikan inovatif, dan penyelidikan bersama bagi kedua-dua pihak," katanya.

Lawatan rasmi selama lima hari itu turut disertai Pembantu Menteri Pelajaran dan Inovasi Sabah, Dr. Jenifer Lasimbang.